

國朝耆獻類徵初編卷二百四十一目錄

守令二十七

吳槐炳

魯九臯

張華甫

侯學詩

吳思樹

路學宏

施韡

胡啟文

子大復

孟周祚

徐大榕

凌浩

劉大紳

周琢

師範

王琨

張敬

呂又祥

洪鑾

補錄

李南湖

卷一百四十一

國朝書目卷一百四十一目錄

國朝耆獻類徵初編卷二百四十一

通奉大夫前署江西巡撫江西布政使司布政使湘陰李桓輯
守令二十七

吳槐炳

乾隆三十有五年歲在上章攝提格 朝廷大開恩榜鶴山吳君
植亭以粵省第十六人出主司上海陸耳山先生孝感簡玉亭先
生門下於時同舉者惟君與饒曼塘馮魚山溫簣坡名最盛而余
濫廁其閒稱齊年辛卯余選庶常厥後曼塘以乙未魚山以戊戌
簣坡以甲辰先後成進士列詞垣君正如旃檀異香逆風彌烈每
當公車北上相見於邸往往作竟日談剴切古今若無難一一見

之行事也者歲辛丑以一等發閩省補縣尹言餞於郊僉謂君此去大抒生平所抱負循聲上播成就未可涯量君曰求冷官以資祿養吾意也今不然猗膏棘軸不能運方穿將奈何慨然而去既至閩大吏器之令代清理省屬積案事竣權知甯洋縣事凡三載內無塵牘外有口碑以事偶掣肘請就司鐸大吏畱之不得蓋君本志原不在百里雷封也次年君補英德縣博士曼塘則以是年鐫職尋補中書魚山亦以是年改比部主事未幾相繼卒余蹶而復起久之乃由給事備兵甌海被議歸迴憶京華聚首今在都中者僅箕坡侍郎一人擁臯比主鱸席逍遙乎詩書之圃則君而已嘉慶己卯余奉纂通志抵省意錄科時君必以職事來庶幾復圖

良覲而君之哲嗣應達亦以與修輯事至出君行狀相示始知君
歸道山葬且有日矣余舊學於太史氏誌墓其職志也因節狀語
舉其大者書之而系之以銘按狀君諱槐炳字耀垣別字植亭著
籍廣東肇慶府鶴山縣曾祖諱雲龍字奕隆別字松茂祖諱紹裘
字嗣芳別字樸園皆埋照攷光弗耀於世考諱奇俊字宗藩別字
秋巖以君貴 貤封修職郎妣黃氏 貤封太孺人松茂之隱於
市也減衣縮食命樸園公率秋巖公從師受舉子業時以瓊頰稱
之松茂公壽日高秋巖公因以身任肆中事督君讀書夜以三鼓
爲節五鼓卽起寒暑風雨無少輟君亦發憤自厲年二十受知於
學使鄭炳也先生補郡弟子員又二年補廩膳生學使則大興翁

覃溪先生也時沈椒園范蘅洲兩先生先後主講粵秀端溪兩書院君從之遊均有國士之目庚寅舉於鄉辛丑大挑一等以知縣發福建試用及至上官委辦閩侯二縣積案一經判斷無有上控者又奉檄監秋讞人犯數百君以各犯遠來則飢飽不時在獄則燥溼不一所以體恤之者備至旋署龍巖州甯洋縣事旣莅任諭民各安本業倡修雙洋書院增膏火延名師以造士縣多鬪殺案君莅事三載獄中無囚犯相驗祇投河道斃兩次論者謂不事擊斷而民如草偃有古良吏風先是縣城東西兩水夾流各有長橋久將圯君重修之更名曰太平曰青雲工甫竣而秋巖公奉樸園公就養至君迎於郭外樸園公率秋巖公爲前導君偕諸子及孫

曾輩隨其後是日也邑人攜老扶幼誼呼塞路僉曰自我等知人事以來未聞有父母官四代同堂又同就養官署者橋成而福人至匪直資利涉抑亦吾邑昌大之徵也邑有開鐵山者其鑪頭悍甚惡少倚爲逋逃藪往往出貽民害君悉其積弊詳請封禁屢請屢駁於是就教職歸計行麓中惟卞文瑜黃癭瓢畫數軸謝古梅黃莘田詩文集十數卷壽山石數十枚而已乙巳六月選英德縣訓導君奉樸園公至署徧覽碧落洞金龍巖諸勝盤桓數月秋巖公則歲往返以爲常英德自康熙閒陽城田文端公來宰是邑建書院立三賢祠唐忠肅公介洪忠宣公皓鄭監門俠每歲春秋祀諸生咸來習禮又以禊日會帽子山重九日會南山聖壽寺作文

賦詩人多向學公旣去邑人立木主祔之曰四賢祠改舊書院曰
文端書院其後寢不振君修復舊觀月課之外令諸生進所業口
講指畫尤諄諄以砥礪廉隅爲訓一時稱爲達師丁巳十月秋巖
公捐館舍君以憂去極哀盡禮三年中未嘗見齒辛酉三月選補
新會縣教諭當是時黃太孺人春秋高君恆慮得缺稍遠則迎養
未便及捧檄喜甚君妹適本邑坡山方氏歸兩歲而寡黃太孺人
素鍾愛之因迎歸同奉太孺人至署癸亥學使者姚秋農先生飭
學查先儒後裔於是新會陳氏認白沙先生嫡嗣者日繼至君問
至白沙村見眾田父耕於隴因與言白沙公故事語及公嫡派則
皆歎息曰微矣祇阿禮一人貧甚歲以蒙館活耳君曰阿禮未聞

學使者訪求先儒嫡裔乎胡不自陳於學官秀才可得也皆曰固聞之然有某某者以千金啖學官學官既許之無能爲已君笑而去詰旦陰使人召陳禮至年三十許誠篤士也試以文頗有條理命以譜牒呈果不謬復之學使而陳禮得遊於庠此事君始終不言其故而傳頌者徧邑中意隴上人作無當卮云庚午四月丁黃太孺人憂以七十之年哀泣作孺子慕從此殆無歡趣矣癸酉冬委署花縣教諭強之任甲戌春得代丁丑三月二十九日無疾而逝君天性純篤五十歲後見秋巖公黃太孺人色稍不豫輒長跪請罪不令起不敢起生平不妄語不才知先人不度人以不肖不爲曖昧不可告人之事急朋友之急如其身初任英德學時同

事嘉應劉公健堂陽亭卒母八十餘矣遺孤四人甚悴爲經紀其喪事俾稍有贏餘而去甲寅秋仁化學陽春譚公某錄科在省卒於客寓卽今戶部主事康侯譚君敬昭父也時試事方殷朝報故而攝篆者夕且至書役各散去朋友亦罕有過存者譚君煢煢然囊無一錢君朝夕慰問奔走設策得扶柩歸里君博極羣書尤加意於先儒語錄旁及釋典道藏著晚香堂詩集二卷花峰樵唱一卷晚香堂家訓二卷格言彙錄二卷畱香齋詩談一卷張曲江集訂譌一卷夢說一卷俱藏於家君生於乾隆壬戌年十月十三日卒於嘉慶丁丑年三月二十九日享壽七十六歲 敕封修職郎配譚孺人 敕封孺人邑處士某公女子七人應韶庠生應達乾

隆乙卯 恩科舉人應圖嘉慶辛酉科舉人景山官學教習俱譚
孺人出應麟廩膳生庶室李孺人出李孺人先君卒應傳應龍應
驥女一人適南海從九品馮翰璋公子侑生炳麟俱岑孺人出孫
男六人逢登建年俱應韶出逢慶逢壽俱應達出逢牲應圖出逢
春應麟出銘曰

英英植亭清芬載纘麟角崢嶸鴻毛奮迅素所樹立匪百里才胡
弗少待乃賦歸來豈云大瓠難容濩落其進可圖其退轉迫知而
能恬淡以濟泊數椽校舍滿座春風七賢同室重闔異宮其樂在
斯奚達奚窮恆言蓄火宿則彌壯斯人不出厥理可況北山之梓
蔥蔚成林有枚有肄四布森森君作古人我見來者闐闐莘莘詎

居人下銘以徵之是曰心寫

右墓誌銘陳昌齊撰

魯九臯

魯九臯江西新城人乾隆三十六年進士家居養親十餘年乃出
選山西夏縣知縣有惠政以積勞卒於官九臯嘗至建甯謁朱仕
琇而受其爲古文之法復與桐城姚鼐友善鼐稱其文沖淡和易
而有體雖本於仕琇而自傳以己之所得持論尤中正其書蘇轍
請罷青苗狀後云青苗法多矣綜其要不出四害之說嘗推言之
朱子社倉之法行之不善與青苗無異蓋青苗所放者錢小民當
穀貴領錢買穀穀賤又賣穀還錢是徵數倍之息矣若夫社倉所
放者穀穀貴得借穀穀賤時仍以穀還雖多取息以錢計之與無
息等利一荒年患無穀有社倉蓄積之民得借貸以食利二春耕

時農視穀如珠禾稼登場或不免狼戾有社倉以收儲無耗散之虞利三然自官行之則抑配一害也胥役橫索二害也放時得賄而給借斂時按籍而追逋民不能堪三害也卽自民行之而不善亦不免於害惟夫曲體人情洞悉民隱當借而弗吝不當借者靳而弗與獎勤而警惰寓激勸於其中及斂之也又視歲入之豐凶以陰行其寬嚴之意則三利可興而四害可免矣九臯學期於有用所著有山木集

右 國史館本傳

君諱九臯字絜非建昌府新城魯氏也大父諱字康熙庚午科舉人爲內閣中書考諱淮歲貢生爲廬陵縣學訓導君爲人敦行誼

謹於規矩而工爲文人觀其言動恭飭有禮而知其學之邃讀其
文冲夷和易而有體亦知其必爲君子也嘗踰嶺至建甯謁朱梅
崖而受其爲古文之法於四方學者苟有聞君必虛心就而求益
雖以爾之陋君嘗渡江至懷甯見爾而有問焉君古文雖本梅崖
而自傳以己之所得持論尤中正里居授其學於子弟及鄉之雋
才又援於其甥陳用光且使用光見爾蓋新城數年中古文之學
日盛矣其源自君也其爲科舉之文不徇俗好自以古文法推而
用之或以爲不利場屋君曰得失命也君竟以乾隆庚寅科得鄉
舉辛卯 恩科成進士歸居十餘年奉養祖母及父因益力爲學
而因事設方以利其宗族閭里雖貧而必致其財雖勞而必致其

力逮終養乃出就官是時肅聞寓書諫君謂今時縣令難爲而君
儒者違其長而用之殆不可然君竟謁選得山西夏縣縣當驛道
又時值後藏用兵使驛往來日不絕縣舊分二十餘里里以次出
錢供役謂之里差吏因爲利民致大困君自持旣廉又減其役之
得已者而重禁侵蠹民大便之而樂爲役君顧歎曰吾不能盡去
里差是吾恨也其見民煦煦然告以義理所當從及去不作長官
威厲之狀民亦欣然聽其教於是縣號爲治上吏亦絕重君矣肅
聞乃自咎前者知君之淺固不能盡君才也然君亦以積勞致疾
在縣凡兩期以乾隆五十九年三月卒於官年六十三娶楊孺人
生四子肇熊肇光嗣光迪光四女子又庶出之子五皆少一女肇